

御  
注  
孝  
經

御製孝經序

朕惟孝者首百行而爲五倫之本天地所以成化聖人所以立教通之乎萬世而無斁放之於四海而皆準至矣哉誠無以加矣然其廣大雖包乎無外而其淵源實本於因心邇厥初生咸知孺慕雖在顓蒙即備天良故位無尊卑人無賢愚皆可以與知而與能是知孝者乃生人之庸德無甚玄奇抑固有之秉彝非由外鑠誠貴乎篤行而非語言之間所得而盡也雖然降衷之理固根於凡民之心而覺世之功必賴夫聖人之訓苟非著書立說以迪天性自然之善抒

人子難已之情使天下之人曉然於日用之恒行即爲大經大法之所存而敦行不怠以全其本始夫亦孰由知孝之要盡孝之詳以無忝所生也哉此孔子孝經之書所由作也朕萬幾之暇時加三復自開宗明義迄於終篇見其言近而指遠理約而該博本之立身以行道推之移風而易俗愛敬所著公卿士庶皆得循分以承歡感應所通東西南北罔不漸被而思服誠萬世不刊之懿矩百聖不易之格言自天子以至於庶人不可一日闕者夫子所謂吾志在春秋行在孝經良有以也自漢以來去聖日遠詮釋滋多



厥旨寢晦孔安國尙古文鄭玄主今文互有異同各  
矜識解魏晉而降諸儒羣興析疑闡奧代不乏人源  
流攸分不無繁蕪迨及開元更立註疏亦旣萃一代  
之菁英垂表章於奕世矣而詳畧或殊詎云至當宋  
之邢昺元之吳澄輩標新領異間有發揮然揆之美  
善或未盡焉至於明季箸述紛紜或拾前賢之緒餘  
文其譎陋或摘古人之紕繆肆彼譏彈不知天懷旣  
薄問學復疎因心之理未明空文之多奚補其於作  
經之意均未當耳夫親恩罔極高厚難酬德至聖人  
猶虞未盡同爲人子孰不佩至教而興永錫之感乎

然則訓詁未確漸摩弗力欲其相觀而善厥路無由  
朕爲此慮爰集古今之註更互考訂其得中而竅繁  
者採輯之其妄逞而臆說者刪除之譬諸沙礫旣披  
美鏐始出稂莠盡剪嘉禾乃登至若流覽之餘時獲  
一是或足以補未發之蘊者輒爲增入聊備參觀總  
以孝之爲道甚大而平故不必旁求隱怪用益高深  
誇示繁縟徒滋複贅惟以布帛菽粟之言昭廣大中  
正之理雖未知於作者之旨能盡脗合可無柄鑿與  
否然而前代諸儒之書瑕瑜難掩與夫近代羣言之  
失淆亂不稽者於茲正之庶幾發矇啓錮四方億兆

咸知儆法而允迪其底於大順之休焉夫如是將見  
至德要道由此而廣和睦無怨由此而成矣

順治丙申仲春望日序

御註孝經

開宗明義章第一

開一經之宗本  
明五孝之義理

仲尼居曾子侍

仲尼孔子字居謂閒居曾子孔子弟子侍謂侍坐

子曰先王有至

德要道以順天下民用和睦上下無怨汝知之乎

古者

稱師爲子先王謂先代聖王也德者人生所得於天之性至德謂盡性之美造其極而無加也道者人所共由事物當然之理要道謂窮理之至舉其一而該衆也順天下謂順天下之人心因其固有而無所強也上下謂自天子至於庶人也孔子言古先聖王有至極之德切要之道以順天下而天下之民亦皆各得其心相親相睦上下尊卑無所怨尤此極隆之治也汝知之乎蓋孔子欲明孝道之大而先發端以問之也

曾子避席曰參不敏何足以知

之

參曾子名禮師有問則避席起荅曾子聞孔子之言甚大且深故瞿然起敬避席立對言參不通敏何足以知此義也

子曰夫孝德之本也教之所由生也

孔子因曾子之對遂告之以至德要



道非他即孝是也孝乃仁之本原仁乃心之全德仁主於愛而愛莫切於愛親故曰德之本本立則道生自然親親而仁民仁民而愛物舉天下之大無一物不在吾仁之中無一事不自吾孝中出故曰教之所由生可見行仁必自孝始而教化由此生焉所以爲至德要道也

**復坐吾語汝身體髮膚受之父母不敢毀**

**傷孝之始也**

曾子起對故使復坐以孝道甚大將詳以告之也始謂孝之根基也人子愛親必自愛身始蓋

一身之四肢髮膚皆父母與我者父母全而生之子當全而歸之朝夕惕不敢毀傷是爲孝之根基故曰始**立身行**

**道揚名於後世以顯父母孝之終也**

終謂孝之完備也言不敢毀傷祇是

不虧其體必須成立此身力行此道使善名揚於後代後之人稱其善而推本其父母之賢是光顯其父母也而後孝乃完備

故曰

**夫孝始於事親中於事君終於立身**

孝本愛親故以事親爲始

移孝可以作忠故以事君爲中忠孝道立方謂之揚名顯親故以立身爲終

**大雅曰無念爾祖聿**

**修厥德**

大雅詩文王之篇周公追述文王之德以告成王者夫子引此以見爲人子孫當念其祖宗而聿修其德則孝



之道始  
可盡也

# 天子章第二

此章言天子之孝天子至尊故居五孝之首

子曰愛親者不敢惡於人敬親者不敢慢於人

愛者仁之

端敬者禮之端惡者愛之反慢者敬之反孔子首言天子之孝以爲天子以天下事親全在以兢業之心盡愛敬之道愛親者必能博愛不敢惡於人敬親者必能廣敬不敢慢於人推是以行則我所以愛人敬人者各得其宜而人之愛我敬我者亦無所不至矣  
愛敬盡於事親而德教加於百姓刑於四海蓋

天子之孝也

愛親以及人之親則天下之人愛我而皆愛吾親矣敬親以及人之親則天下之人敬我而皆

敬吾親矣愛以天下愛之至也敬以天下敬之至也豈非愛敬盡於事親乎天子者天下之表也上行則下倣君好則民從我之愛既盡則人亦興於仁而各愛其親矣我之敬既盡則人亦興於禮而各敬其親矣如是則百姓之衆四海之大同歸於孝矣此天子之孝  
甫刑云一人有慶兆民賴之  
甫刑即書經呂刑篇一人

謂天子兆民謂百姓四海孔子引呂刑之言謂一人有愛敬之善則兆民皆仰賴之以見天子合天下之孝以為孝也

### 諸侯章第三

此章言諸侯之孝兼公侯伯子男

在上不驕高而不危制節謹度滿而不溢

在上在一國臣民之上也

費用約儉謂之制節慎行禮法謂之謹度諸侯為一國之君其位高矣高者易危若能不以尊自驕位雖高不至于危享一國之賦其財滿矣滿則易溢若能制節以謹守侯度財雖滿不至于溢是知貴不與驕期而驕自至富不與侈期而侈自生諸侯固當戒之也 高而不危所以長守貴也滿而不溢所以長

守富也

居高位而不危則不以陵傲召禍而致卑替其位可長居矣財充滿而不溢則不以僭侈費財而致虛耗其富

可長有矣蓋言不危不溢其道行之可久也

富貴不離其身然後能保其社

稷而和其民人蓋諸侯之孝也

社土神稷穀神列國皆有社稷其君主而祭之諸侯

之社稷民人皆祖宗受之於天子而傳之子孫者故上承天子下撫國人必小心慮患長守富貴不離其身然後能保守社稷

而民人和悅此諸侯之孝也詩云戰戰兢兢如臨深淵如履薄冰詩小

雅小旻之篇引此以見爲諸侯者常須戒懼如臨淵恐墜履冰恐陷方能不危不溢以盡其孝道也

### 卿大夫章第四

此章言卿大夫之孝卿與大夫不同而合言之者其行同也

非先王之法服不敢服非先王之法言不敢道非先

王之德行不敢行

法服謂先王所制章服各有品秩也法言謂禮法之言德行謂道德之行卿大夫事

君從政承上接下服飾言行須遵禮典非法服而服之是僭服非法言而道之是妄言非德行而行之是僞行三者皆於孝道有虧故敬慎守之而不敢違也是故非法不言非道不行口無擇言身

無擇行言滿天下無口過行滿天下無怨惡

是故其不敢之

心不言則已言必守法不行則已行必遵道口之所言身之所行皆遵道法故無可擇言之多雖滿天下既有禮法自無有率惡矣蓋三者之中言行猶爲切要故重言以明之也三者備

矣然後能守其宗廟蓋卿大夫之孝也

三者即服言行是也禮卿大夫

立三廟以祀先祖必三者無虧然後能保守宗祀卿大夫之孝當如是也

詩云夙夜匪懈以事

一人

詩大雅蒸民之篇一人謂君也引此以明爲卿大夫者能早夜不惰敬事其君則戒懼之心常存自無三者之失也

### 士章第五

此章言士之孝

資於事父以事母而愛同資於事父以事君而敬同

士始升公朝離親入仕家修而廷獻之故言取於事父之行以事母則愛母與愛父同取於事父之行以事君則敬君與敬父同子未常不敬母也而愛先之母以鞠育而愛厚也然充其愛母之心承歡色養不敢少違母意非敬乎臣未嘗不愛君也而敬先之君以尊高而敬生也然揆其敬君之心奔走服勤不忍少負君恩非愛乎總之愛敬皆出於誠心其自然之性情有如此者故分言以明其真摯之極而其理未常不兼具也

故母取其愛而君取其敬兼

之者父也

此言事父之道兼愛敬也爲臣子者於君與父母其愛敬之心原無分別惟親至則敬不極蓋言情



親而禮節儀文之恭自少非謂不敬也尊至則愛不極蓋言心敬而左右依戀之時不多非謂不愛也惟父則得朝夕奉養與母同奉教秉命與君同故云事父之道兼愛敬者故以孝事正以明愛敬之真心俱有其極無少虛僞之義

### 君則忠以敬事長則順

士初離膝下方登仕籍或未盡知事君事長之道然而愛敬父母者

所謂孝也以此孝道事吾君則不忍欺君之心即愛親之孝也為人臣而至於不忍欺不敢慢者不謂之忠也可乎長謂卿大夫也以事父兄之敬用之事長則此心常存謹畏自不至有驕陵之心悖慢之行而同寅協恭以為師法可謂順矣究之忠順皆本於事親之孝也

### 忠順不失以事其上然後能

### 保其祿位而守其祭祀蓋士之孝也

上兼君長而言士亦得立宗廟祀其

先祖言能合忠與順而不失其道以事君與長則君諒其忠卿相樂其順然後能保其俸廩之祿官爵之位而永守祖先之祭祀蓋士無田則不祭故祿位與詩云夙興夜寐無忝爾所祭祀相關而士之孝當如是也

### 生

詩小雅小宛之篇所生謂父母引此以見為士者當小心勉力早起夜寐求無辱其父母而無辱之道則在於忠順不失

也

# 庶人章第六

此章言庶人之孝

## 用天之道分地之利

庶人服田力穡舉農畝之事順四時之氣春氣發生則當耕種夏氣長養

則當芸苗秋氣收斂則當割穫冬氣閉塞則當蓋藏推之凡事而必順時此用天道也分別山林川澤丘陵墳衍原隰五土之高下隨其地之宜產者而播種之此分地利也不順天道則先時後時而物無以生不辨地利則終日勤動而物終不成二者皆得則生植成遂

## 謹身節用以養父母此庶人之孝也

衣食既足仰足以事父母而父母安之即俯足以育妻子而樂我妻孥父母之心亦用慰也然凡人之情稍充裕則多生事尤必謹身守法不敢放縱以遠耻辱罪戾而不遺父母之憂且財有餘則易耗費又當省儉用度不敢奢侈公賦既完私用不窘以無闕二親之奉如此養其父母不徒口體之

## 故自天子至

於庶人孝無終始而患不及者未之有也

上自天子下至於庶人雖

有尊卑之分其根於一本之天性則一也孝雖有五等之別其所以各盡其道以抒其不能自己之情則一也若心欲行孝則隨所處而皆可以自盡蓋自有身以後無日非爲人子之日則無日非當盡此孝道之時豈有久暫之殊姑待之日而以力不及爲患者此必無之理也爲人子者貴賤貧富皆當自勉不可以所遇不同而生怠緩之心也

### 三才章第七

此章言孝道之大及本孝立教之義天地人謂之三才

曾子曰甚哉孝之大也子曰夫孝天之經也地之義

也民之行也

曾子平日以保身爲孝不知孝之通於天下無限尊卑故聞夫子之言始知孝道之大遂歎美

之而夫子遂言民性之孝原於天地天之三光有度而以生物覆幬爲常故曰經地之五土有性而以承順利物爲宜故曰義得天之性爲慈愛得地之性爲恭順是即孝也孝爲百行之首人所當常行者故曰民行由是觀之孝合三才以爲大在天爲經在地爲義在民爲行其實一理也天地之經而民是則之則天之明因

地之利以順天下是以其教不肅而成其政不嚴而

治

凡民生於天地之間稟天地之性天地既具此經常之理人法天地亦當以此爲常行也夫民自初生以來皆知愛親愛

親之心即孝也然此愛親之心有不知其然而然者窮之而無原執之而無體用之而無盡廣大而無際豈非天地之經乎但

民不能自法天地全賴聖人倡之聖人則天之明承三光紀四時而民皆出作入息始知夙興夜寐無忝爾所生因地之利辨

五土播百穀而民皆耕田鑿井始得晨羞夕膳敬養無違是統因夫天地自然之道以順天下人民孝養愛敬之心而立之政

教實聖人之事也惟其政教既順於人心是以人皆樂從教則不待肅戒而自成政則不待威嚴而自治其化之神有如此者

是益知孝者天性之自然人心所固有聖人之政教所以云順天下也

先王見教之可以化

民也是故先之以博愛而民莫遺其親陳之以德義

而民興行先之以敬讓而民不爭道之以禮樂而民

和睦示之以好惡而民知禁

政教皆可以化民而本孝之教其化尤神先王知此教本

於天地易於化民也是故以身先之人君愛其親而推此愛親之心以博愛其民民皆法則之施由親始無有遺棄其親者矣



陳說德義之美以感動民心民皆興起於躬行而無有甘於自棄者矣又身行敬讓以率先天下而民皆讓路讓畔無有陵競之行矣復導民以禮正其身而節其行導民以樂平其心而怡其情禮樂兼備內外交養民皆和順親睦而無乖戾之心矣又示之以善之當犯惡之當惡好則有慶賞惡則有刑威民遂知有禁令而不敢犯矣凡此者皆因天地以順天下之事而教化之捷應如此又何疑於孝治之大也

**詩云赫赫師尹民具爾瞻**

詩小雅節南山之篇師尹

周太師尹氏也引此謂師尹不過大臣尙且爲民瞻望況有天下者以身行教化又何難於化民成俗乎由是而知教明於上化行於下觀感興起之益良匪淺也

### 孝治章第八

此章言由孝而治之義

子曰昔者明王之以孝治天下也不敢遺小國之臣而況於公侯伯子男乎故得萬國之歡心以事其先

王

此言天子之孝治也昔者明哲之王以孝道而治理天下也推其愛敬之心至於附庸小國之臣尙不敢遺忘以闕其禮